

淮海後集目錄

卷

詩

進南郊慶成詩

越王

山陽阻淺

送洪景之循州參軍

茶臼

劉公幹

贈張潛道

酬曾逢原參寥見寄

無題二首

東城被盜得世字

送佛印

蓬萊閣

幽眠
隕星石

次韻參寥辛老

茶

石魚

贈醫者鄒放

荷花

吳興道中

喜雨得城字

夢伯收文公

流觴亭

送羅正之提刑

卷二

詩

秋夜病起懷端叔

抱甕

和顯之長老

南池

宿金山

李端叔見寄次韻

自警

雪浪石

早春

無題

卷三

詩

次韻孔彥常曝書

送陳太初道錄

送孫誠之尉北海

讀列子

清夜

和王定國

別賈耘老

陳令舉妙奴詩

陪李公擇觀金地佛牙

和蔡天啓贈文潛之什

赴杭倅至汴上作

織錦圖五首

次韻莘老

贈蘇子瞻

次韻安州晚行

題五柳亭

觀寶林塔張燈

還自湯泉十四韻

次韻辨才

次韻公闢二首

次韻公闢卽席呈太虛

次韻公闢蓬萊閣

次韻公闢聞角

寄公闢

呈公闢

奉和莘老

中秋致語

致政通議口號致語

口號

悼王子開五首

卷四

詩

秋興九首

擬韓退之
擬玉子川

擬孟郊

擬韋應物

擬李賀

擬李白

金山晚眺

擬杜子美

擬杜牧之

擬白樂天

病中

聞鴈

冬蚊

白馬寺晚泊

雪上感懷

和程給事判六首

處州閑題

春詞五首

秋詞二首

齊逸亭

春日

雪中寄丹元子

宿乾明方丈

新開湖送孫誠之

呈李公擇

落日馬上

次韻參寥三首

和書賀祕監堂三首

和書觀妙庵

早春題僧舍

盆池釣翁

賞酴醾有感

首夏

卷五

雜文

代蘄州謝上表

代程給事乞祝聖表

坤成節功德文疏

代答范相公啓

賀孫中丞啓

賀吏部傅侍郎啓

代何提舉賀樞密啓

賀門下呂僕射啓

謝潁州呂吏部啓

答丁彥良書

與許州范相公書

祭監稅主簿文

卷六

雜文

雜說

蠶書

時食

化治

鎮星

車

戎治

錄龍井辯才事

題彭景山傳神

清和先生傳

請立程給事祠堂狀

故龍圖閣直學士中大夫知成都府李公行狀

通事說

種變

制居

錢眼

添梯

禱神

書丁彥良明堂議

書王氏齋壁

淮海閒居集序

法雲長老然香會疏

精騎集序

淮海後集卷一

詩

淮南郊慶成詩

并表

右臣伏觀皇帝陛下肇修典禮。冬日至。親有事於南郊。仍復祖宗故事。以皇天地祇合祭。前期之日。陰雲蔽空。將祀之夕。月纔畢宿。詩云。月離于畢。俾滂沱矣。於法當雨。而是夜開霽。特甚晏溫。星月昭明。禮畢之明日。雨雪乃作。朝市郊野。相告欣然。頌嘆之聲。形于中外。非二聖有作。上當天心。神祇顧享。何以逮此。臣雖疎賤。通籍祕省。預見熙事。不勝犬馬區區之情。輒將與人之頌。撰成郊禮慶成五言二十韻詩一首。隨狀上進。干冒宸嚴。臣無任瞻天望聖。激切屏營之至。

於赫龍飛後。中區八月秋。合嚴天地祀。遠繼祖宗休。熙事將興舉。彝章預講諏。紛然曲臺議。斷自太任謀。宗伯方承命。元龜遂告猷。三錢封內帑。五瑞輯諸侯。路寢前齋玉。清宮復射牛。長迎南至日。圓卽自然丘。扈蹕三千劍。干霄十二樓。鈎陳嚴御座。太一奉宸遊。好雨虛聞畢。生陽不待鄒。浮雲依斗散。華月亘天流。宵被黃裯却。霜空曲蓋收。堪輿同顧嚮。河嶽盡懷柔。麾日初鳴仗。旂風不滿旒。回鑾龍入馭。傳詔鶴爲郵。崇慶天難老。華胥聖不憂。衣冠千玉簡。宇宙一金甌。可但豐年屢。當知世德求。慚無班馬手。作頌配商周。

幽眠

幽眠起常晚。冬晷復不長。中間數十刻。倏如驚燕翔。晨冷粗云畢。申鼓鳴相望。忽忽竟何就。念之動中腸。

天地一逆旅。死生猶轉商。暫來旋云去。遲速乃所常。較計亦何補。徒然非慨慷。不如聽兩行。一概付酒觴。北風吹老槐。白日轉紙窗。布衾一覺睡。身世成渺茫。宿莽冬不衰。蘭茝幽更芳。無庸傷局促。速此鬢髮霜。

越王

越王念吳役。寢興常不安。有臣曰種蠡。實與同難艱。終酬會稽恥。列國不敢干。智者見未兆。愚夫暗前觀。范公拂衣去。扁舟五湖間。清輝照四海。秋月耿雲端。種也竟不悟。處之若無難。屬鏤一朝至。身與名俱殘。兔走獵狗悲。鳥盡良弓閑。自古身不退。多爲世所歎。

隕星石

蕭然古丘上。有石傳隕星。胡爲霄漢間。墜地成此精。雖有堅白姿。塊然誰汝靈。大眠牛礪角。終日蒙羶腥。疇昔同列者。到今司賞刑。森然事芒角。次第羅空青。俛仰一氣中。萬化無常經。安知風雲會。不復歸青冥。一日行一尺。十日行一丈。豈不歎淹留。所幸無波浪。悲風動深夜。原野眇森爽。青天行蟾蜍。枯水轉魍魎。此時蓬茅下。去心劇於癢。棄置勿復論。通塞如反掌。

山陽阻淺

次韻參寥莘老

迅風薄高林。萬象號虎豹。紛披枳與棘。爾復鼓狂鬧。我垣旣已頽。我棟又以撓。豈無一木枝。橫力難與較。黎明忽自罷。晴日射魚罩。死水失狂瀾。衰木回故貌。勞生真一作夢事。往趨如睡覺。炊黍焚黃犢。吾其理。

歸棹。

送洪景之循州參軍

寒梅不自重。輒花桃李先。矯枉有佳菊。最後衆芳妍。各因一時美。難以相嗤憐。物理固若是。士林亦宜然。夫子南國俊。聲猷推妙年。數奇晚方偶。參軍古龍川。龍川雖云遠。風物號清鮮。羅浮不相下。顏頤嶠荒天。雲鬢二三子。聊足奉周旋。行矣試老拳。歸歟遠翔鶩。

茶

茶實嘉木英。其香乃天育。芳不愧杜蘅。清堪揜椒菊。上客集堂葵。圓月探奩蠹。玉鼎注漫流。金碾響丈竹。侵尋發美啜。猗猗生乳粟。經時不銷歇。衣袂帶紛郁。幸蒙巾笥藏。苦厭龍蘭續。願君斥異類。使我全芬馥。

茶白

幽人耽茗飲。剝木事撻撞。巧制合臼形。雅音侔枕櫳。虛室困亭午。松然明鼎鑪。呼奴碎圓月。搔首聞鐸鏜。茶仙賴君得。睡魔資爾降。所宜玉兔擣。不必力士扛。願偕黃金碾。自比白玉缸。彼美制作妙。俗物難與雙。

石魚

佛宮琢琳瑯。懸魚警羣聰。緩扣集方袍。急拊趨百工。雖無笏虛器。自協徵與宮。鞞然當人心。邈有炎氏風。山泉自疏數。珮玉相玲瓏。朝昏間鍾鼓。清響傳無窮。惟有寶陀山。於音獲圓通。一聞如得解。石鞞亦投弓。

劉公幹

邾中多賢豪。公幹氣飄逸。弱歲頗徊徨。飄零低金室。君王事邀宴。下馬列琴瑟。豪吹挾哀彈。娛歡非一日。

當年侍廣酬。珠玉任揮筆。五字一何工。妙絕冠儔匹。所得雖經寄。未得偏人失。

贈醫者鄒放

百工皆聖作。惟醫有書傳。緒餘起人死。妙處實通天。鄒子本淮海。弱齡加討研。岐扁逢卷中。遂知百病先。往歲游京室。公侯紛薦延。國工不敢妬。遣兒求執鞭。晚棄本州役。青衫鬢蕭然。臨衢開大肆。旁午送金錢。嗣子頗不凡。文場早周旋。行期拾青紫。善積神所憐。

贈張潛道

張生何爲者。落魄不自拘。獨攜三尺琴。笑別妻與孀。一來泊吾里。忽已月再虛。朝遊故人館。暮止佛子廬。雖無食羹餘。所樂常晏如。我欲有所進。生聞勿煩紆。君子閑有道。不專塊然居。無道抵深適。鳴戲亦已愚。願生脫塵鞅。從我滄海隅。

荷花

方塘收雨腳。落日半遙岑。芙蕖淨娟娟。麗服撫翠衾。無言意自遠。欲渡秋水深。緬懷平生人。對此詎可尋。弄芳惜晷晚。酒至誰與斟。天涯有歸雲。聊寄相思心。心開獲清賞。芙蕖一何綺。美人鹽新粧。斂袂照秋水。端如蕩子妻。顧自良家子。黃金選燕趙。搖落對江沚。薄暮風雨來。獨立淚如洗。望君君詎知。傾宮定誰似。酬會逢原參寥上人見寄山陽作

倦客當老秋。忽忽少佳意。孰云塵滓地。劉阮肯俱至。一披清骨毛。再見失身世。有如執盛熱。僂月灑涼吹。又如觀巨梓。却覩蕭葦細。十辰同遨遊。不覺日車逝。嗟予逃空虛。終日面林翳。聞人足音喜。況乃道所契。

方念衣袖分。明月忽我界。眷言何以酬。白髮同所詣。

吳興道中

黽勉華門下。十年守一方。胡爲御舟者。挽我置此傍。青山不肯盡。流水故意長。雖云道理遠。瓦樽有酒漿。

無題二首

其一

君子有常德。所遭能自如。不與死生變。豈爲憂患渝。西伯囚演易。馬遷罪成書。性剛趣和樂。淺淺非丈夫。

其二

世事如浮雲。飄忽不相待。欻然化蒼狗。俄頃成章蓋。達觀聽兩行。昧者乃多態。含旃勿重陳。百年等銷壤。

喜雨得城字

陰陽有常職。代御不可并。一氣或錯繆。愆伏相寇兵。惟時四月交。南國厭久晴。風師挾帝令。呼號肆徂征。雲師晨推逐。蓄意不敢爭。雨師曠厥官。所苟朝夕生。黃塵暗如霧。掩彼日月明。帝眷一夕回。旱議沮莫行。番然霑膏澤。夜半來雨聲。黎明縱遐眺。溝澮各已盈。青秧散廣畝。白水涵孤城。耕夫欣有託。水鳥飛且鳴。乃知化工妙。悠然信難名。行矣耘我穡。歲終峙坻京。

東城被盜得世字

野人無機心。觸事少防衛。所至輒酣寢。屢墮穿窬計。孤亭夜深墨。風死雨初霽。有盜穴壁來。攫取遽衾袂。微思不敵怒。弱力鼓虛銳。起搏且復呼。可否誰量勢。誰云同室鬪。函丈莫相繼。兩奴眠牖旁。矯首但睥睨。

棄之倚柱休。盜亦從此逝。慚無牛缺賢。幸脫燕人斃。亡弓豈須求。失馬不必涕。黎明成感歎。事往若異世。良賈號深藏。無閔稱善閉。君子勿我誇。得喪求無際。

夢伯收文公

昨夜夢故人心。顏少歡趣。自嗟棄有司。却言歸山路。君王下明詔。羣英翕爭赴。焦鵬共揮翮。跋鼈亦騁步。擾擾天地間。飛鳥不知數。何意獨蕭條。命與時相忤。空復蔽馬牛。不爲匠人顧。昔爲土中花。行待東風照。今爲簷下草。遠矣霑秋露。老母鬢成絲。寒妻被無絮。歲莫多嚴風。絺綌將焉度。覺來不復見。撫枕淚如注。安得萬頃陂。活此舟中鮒。

送佛印

抱包初捨蔚頭藍。江月松風處處參。他日惠林爲上首。幾年彌勒作同龕。眞珠撒帳開新座。飛鳥啼花繞舊庵。雲散虎溪蓮社友。獨依香火思何堪。

次韻公關會流觴亭

偷引湖光一派飛。詠觴還却似當時。吳歌送酒隨流急。越豔浮花轉曲遲。山廟早因前守徹。冰盤元是故工遺。年年禊飲今非昔。不到蘭亭到北池。

次韻公關會蓬萊閣

林聲撼撼朔秋風。共躡丹梯上臥龍。路隔西陵三兩水。門臨南鎮一千峯。湖吞碧落詩爭發。塔湧青冥畫幾重。非是登高能賦客。可憐猿鶴自相容。

送羅正之兩浙提刑

豈爲鱸魚憶故丘。東南昏墊賴良謀。一封暮別雲間閣。三組秋歸海上州。子政暫爲都水使。千秋終作富民侯。贈君一語君應笑。競注江河本不流。

淮海後集卷二

詩

秋夜病起懷端叔作詩寄之

寢療嘗老秋。入夜庭軒空。大光脆如洗。月色清無縫。風颺戾戾輕。露氣霏霏重。簷花伴徐步。籠燭窺孤諷。緬惟情所親。佳辰誰與共。夫子淮海英。材大難爲用。秉心既絕俗。發語自驚衆。塵尾扣球琳。筆端攢螭螭。雄深迫楊馬。妙麗該沈宋。浮沈任朝野。魚鳥狎鯢鳳。與時真楚越。於我實伯仲。爾來居邑鄰。頗便書札貢。上憑鴻鴈傳。下託鯉魚送。二物或愆時。已辱移文訟。人生無根柢。泛若愛波葑。昧者復汲汲。晨暝趨一閤。陰持含沙毒。射影期必中。自匿嫫母容。容對施錦幃。溢然一朝逝。萬事俱成夢。形骸猶汝辭。利勢猶君動。思之可太息。傷之爲長慟。所以古達人。脫身事高縱。我生尤不敏。胸腹常空洞。彊顏入規模。垂耳受羈轡。行謀買竿棧。名理就折衷。但恐狂接輿。煩君更嘲弄。

送孫誠之尉北海

吾鄉如覆孟。地據揚楚脊。環以萬頃湖。黏天四無壁。蜿蜒戲神珠。正晝飛霹靂。草木無異姿。靈氣殊鬱積。所以生羣材。名抱荆山壁。小爲百夫防。大爲萬人敵。夫子少邁倫。暗鳴阻金石。奏賦明光宮。玉座瞻咫尺。翻身墮雲霄。十載迫窮厄。焚舟更一戰。得尉滄海北。五月乘畫船。簫鼓事遠適。天橫齊山青。雨帶楚水黑。勿云晚方仕。四十乃古昔。勿云名位卑。九萬自此擊。幽求尉朝邑。鬢髮森已白。元振尉通泉。律令非所卽。

一朝會風雲。顧眄立四極。行矣壯舊圖。勉

逸下缺。

抱壺

攢攢抱壺人。忙呼治其內。仲尼爲所輕。子貢無以對。捨器欲還樸。爲量固已隘。苟得渾沌真。事差事機械。

讀列子

咄咄兩小兒。多言空爾爲。後之日無定。不覺心有期。尺捶探蒼溟。但令傍者嗤。誰謂不能決。孔丘乃真知。

和顯之長老

禪子觀因緣。寸晷無復餘。講人治經論。艾夜猶未除。冷風奏哀松。寒月挂碧虛。此意了不諭。悲哉同翳如。

清夜

子夜天無雲。稀星耿頑碧。茫茫行役者。對此焉不息。胡爲蝸角端。相與競尋尺。勸君歸去來。飛空鳥無跡。

南池

汎汎池中鳧。上下與水俱。不與水爭力。所以全其軀。遇物貴含垢。脩身戒明污。胡能若雲月。浪自驚羣愚。

和王定國

嵒嶮歲月徂。物色莽於邑。歡言公子至。坐失百憂集。霽箔蕙煙橫。寒炮玉脂泣。勉旃決南圖。荷華行滿隰。

宿金山

山南山北江水流。半空金碧隨雲浮。我來仍值風日好。十月未寒如晚秋。山僧引客尋蒼翠。歷卷參差到平地。萬里風來拂骨清。却憶人間如夢寐。夜深無風月入扉。相對老人如槁枝。流水與天爭入海。共笑此

心誰得知。下山却向中還望。番憶當時在屏障。老母思兒且欲歸。回首雲峯已天上。

別賈耘老

若有人兮。誓之濱。服火齊。今冠切雲。有才不爲世所掄。盡入詩句爲奇新。忘歸繁弱不浪陳。發必中的。疑有神。目關飛鳥。緝蒼鱗。俛仰自娛。忘賤貧。繫我與君素參辰。孰爲一見同天倫。共指飛光易沉淪。莫若痛飲還我真。況有內子賢文君。終日叫呼。不怒噴。酒酣往往出前珍。瓦甌竹筩。弄青芹。左列文史。右紅裙。樽前不覺徂清晨。念我行當西道秦。擊舟來別非所欣。欲託毫素通殷勤。郢匠旁矚難揮斤。人生百齡同臂伸。斷梗流萍。暫相親。行行飲酒且勿云。丈夫萬里猶比鄰。

李端叔見寄次韻

君文豪膽無與儔。使我吟諷忘離憂。浩如沅湘起陽侯。翻星轉日吞數州。華章藻句饒風力。頃刻朱紅迷畛域。一班縱復爲管窺。萬派終難以蠡測。區區文墨倦高情。解鞅還游恍惚庭。半槽新水六尺簾。臥視雲物行空青。伊我籃輿抵京縣。溥著黃埃負初願。君家只在御城東。彌月不能三兩見。求仙未若醉中真。蟻鬬蛾飛愁殺人。清都夢斷理歸棹。回首一樹瓊枝新。歸來草木春風換。世事蜚毛那可算。幸謝故人頻寄書。莫笑元郎自呼漫。

陳令舉妙奴詩

西湖水滑多嬌嬌。妙奴十二正芬芳。肌膚皙白髮腳長。含語未發先有香。溪上夜燕侍簪裳。皎如華月墮滄浪。音聲入雲能斷腸。不許北客辭酒漿。主人藹藹邦之良。少年射策謁未央。俊詞偉氣森開張。玉杓貫

斗生怒芒。天欲文采老更昌。故使斂翮窺羣翔。五十僅補尙書郎。浩歌騎牛倚徜徉。東風戲雨花草狂。二溪泱泱青黛光。妙奴勿倦倩羽觴。主人正欲游醉鄉。

自警

古人去後音容寂。何處茫茫尋舊迹。君看草遍北邙山。帶髓猶來丘壟積。那堪此地日黃昏。長途萬里傷行客。只知恩愛動傷情。豈悟區區頭已白。莫嫌天地少含弘。自是人心多褊窄。爭名競利走如狂。復被利名生怨隙。貪聲戀色鎮如癡。終被聲色迷阡陌。休言七十古稀有。最苦如今難半百。閒道蓬宮仙子閑。紅塵不染無瑕謫。日月遲遲異短明。二峯秀麗皆仙格。女蘿覆石蔓黃花。芝草琅玕知幾尺。桃源長占四時春。漾漾華池真水碧。乘槎擬欲扣金局。巨浪洪波依舊隔。歸來芳舍與誰儔。老鶴松間三四隻。洞天聲動彩雲飛。對我時時振長翮。鸞未遇且悠悠。盡日琴書還自適。紛華任使投吾前。爭奈此心終匪石。拜命懷金誰謂榮。低頭未免拾言責。從茲俗態兩相忘。笑指青山歸路僻。同人有志覓長生。運氣休糧徒有益。須知下手向無爲。莫學迷徒賴針灸。

陪李公擇觀金地佛牙

薄伽梵相含空虛。化人分段同璫璫。爾來示滅二千歲。真骨萬里傳中區。錢塘有尼號法照。得自禁掖藏金鋪。欲因此勝高構閣。假設象似開羣愚。偶從好事至甯上。持出瞻玩相歡娛。露牙寶色玉不如。上有無數光明珠。莊嚴一一出御帑。蜿蜒繡袋榮禪禪。是時賓客盡上士。回向已登十地初。殷勤稱讚出軟語。坐人顧眄驚俗汚。因悲人生信如夢。浪逐聲勢霜鬢髮。一源清淨誰復無。枉入諸趣更崎嶇。願因今日詣真

際。古松白日常蕭疎。乃知金仙妙難測。餘潤普及霑凡枯。況復老尼亦才辯。朱甍碧瓦非難圖。行看嵒嶠倚青嶂。翁媼頌說傾三吳。

雪浪石

漢庭卿士如雲屯。結綬彈冠朝至尊。登高履危足在外。神色不變惟伯昏。金華掉頭不肯住。乞身欲老江南村。天恩許兼兩學士。將兵百萬守北門。居士彊名曰天元。寤寐山水勞神魂。高齋引泉注奇石。迅若飛浪來雲根。朔南修好八十載。兵法雖妙何足論。夜闌番漢人馬靜。想見雉堞低金盆。報罷五更人吏散。坐調一氣白元存。

和蔡天啓贈文潛之什

蔡侯飽學困干釜。濯足清江起南土。劇談頗似蒸客豪。快奪范雎如墜雨。東城橋梓未足論。栢直何爲口方乳。蔣信山中伴香火。三年不厭長蔬苦。平生瑰瑋有誰同。要得長侯三日語。晝閑那自運甓忙。時清不用聞雞舞。桓榮歡喜見車馬。書冊辛勤立門戶。要當食肉似班超。猛虎何嘗窺案俎。

早春

黃金蔌蔌滿垂楊。尚有春寒到畫堂。酒力漸銷歌扇怯。入簾飛雪帶梅香。

赴杭倅至汴上作

俯仰軀稜十載間。扁舟江海得身閑。平生孤負僧牀睡。准擬如今處處還。

無題

掃地燒香閉閣眠。簾紋如水帳如煙。客來夢覺知何處。挂起西窗浪接天。

蘇子瞻記江南所題詩本不全。余嘗見之。記其五絕。今以補子瞻之遺。

東坡坡并三絕見正集第十卷。粧幃錦詩注下。

紅窗小泣低聲怨。永夕春風斗帳空。中酒落花飛絮亂。曉鶯啼破夢忽。
啼草露如郎倖薄。亂花飛似妾情多。歸鴻見處彈珠淚。語鶯聞時斂翠蛾。
琴絃斷續愁兼恨。嶺水分流西復東。深院小屏紅日落。繡牕閑倚更誰同。
參橫霽色天沉水。鳥宿寒枝竹瑣煙。衾惹舊香清夜半。淚凝殘燭畫堂前。
寒信霜風似葉黃。冷燈殘月照空牀。看君記憶傳文錦。字字愁縈惹斷腸。

其二

其三

其四

其五

淮海後集卷三

詩

次韻孔彥常舍人曝書

上帝圖書府。傳觀詔特容。嘉賓蒼佩玉。盛饌紫馳峯。散映牙籤亂。開函錦襲重。君羹如可請。願備北堂供。

次韻莘老

妙齡隨計日。紺髮度關年。較藝先豪俊。飛聲動眇綿。祕書窺甲乙。密室詣溫宣。已叶半千運。仍親尺五天。御香春晚炷。宮蠟夜深燃。漢殿螭頭筆。岐藩幕下蓮。孔鸞人共貴。蘭蕙世皆憐。附尾方瞳若。提刀獨善然。皂囊封細札。青簡續遺編。璧府深難造。龍媒雋莫先。大農參奏計。宗伯與興賢。玉鉉行真卽。金甌忽浪傳。兩輪若上駕。百丈剡中牽。荏苒馮唐老。淹回賈傳還。星霜俄九換。金竹遽三遷。鼓吹吳雲外。旌旛楚水壖。經綸殊未倦。憂患復相連。惡草空搖毒。羣蝸謾污涎。松筠終不易。雨露竟無偏。憔悴千株橘。荒涼二頃田。幾書借船帖。屢廣絕交篇。禪譽推龐蘊。親評主閔騫。懶因閑處極。樂向靜中全。歲月黃塵裏。鶯花白髮前。水裏清照底。玉海湛無邊。身世尤飛隼。功名眇蛻蟬。蕉心難固待。楮葉謾勞鑄。佇續清都夢。還隨濁世緣。泉虬淹已久。風翮去應便。預想朝元處。簪裾立萬仙。

送陳太初道錄

先生簪紱後。世系本綿瓜。駐馬生枯骨。回車濟病蛇。帶雲眠酒市。和月醉漁家。落日千山路。西風一枕霞。

幾年流俗笑。一旦五侯誇。暮惜春深日。琴憎雨後蛙。背因書字曲。髮爲注經華。地轉東淮水。天回北斗車。新宮黃道近。舊隱白雲遐。顧我身多累。逢君意謾加。空提方士劍。未上客星槎。何日同歸去。重飛九轉砂。

贈蘇子瞻

嘆息蘇子瞻。聲名絕後先。衣冠傳盛事。兄弟固多賢。感慨詩三百。流離路八千。直心羞媚竈。忠力欲回天。縲紲終非罪。江湖祇自憐。饑寒常併日。疾病更連年。明主無終棄。西州稍內遷。奏言深意苦。感涕內人傳。前席須宣室。非熊起渭川。君臣悅相遇。願上角招篇。

次韻安州晚行寄傅師

投暮安州北。蒼煙亂眼昏。茅茨人外路。砧杵月邊村。野水飛雲薄。空林噪雀繁。幾人堪此樂。逢客莫輕論。

題五柳亭

結構依流水。新題五柳亭。登臨有遺味。攀折不勝情。隔崖聞閭鼓。遶軒舟舫橫。下缺一聯

觀寶林塔張燈次胡瑗韻

飛來峯上塔。然密奉慈觀。互照三山冢。分輝七寶欄。勢擎金界迥。影蘸玉奩寒。次第邊烽舉。高低祭燭攢。虹旌排陣塊。火傘御靈官。魏乘珠千顆。隋帆錦萬端。華敷連藏海。光集匝宮壇。問問連青昊。熒熒逼翠巒。月卿秋抒思。星將夜濡翰。繼聽鈞天奏。尤知屬和難。

還自湯泉十四韻

歲晚倦城郭。聯聯度藥裘。天黃雲脚亂。村黑鳥翎訛。潦水侵生路。晴天落慢坡。澄紅練不卷。溫井鑊新磨。

漁火分星遠。沙鷗散點多。竊祠題玉筍。龍窟受金波。琬琰存吳事。兒童記楚歌。孤蘿瘦居士。雙塔盞頭陀。飛鼠鳴深穴。胡蜂結巧窠。晚參圓白足。昏梵禮青螺。雲馭沉荒堊。仙舂沒淺莎。杖藜從莫逆。談笑入無何。滌澹日連霧。蕭騷風轉阿。華清俄夢斷。回首失煙蘿。

辨才法師嘗以詩見寄。繼聞示寂。追次其韻。

遙聞隻屨去。翛然詩翰纔。收數月前。江海盡頭人滅度。亂山深處塔孤圓。憶登夜閣天連牖。同看秋崖月破煙。尚有衆生未成佛。肯超欲界入諸禪。

次韻公關州宅月夜偶成

其一

新秋過雨月如霜。緩足蓬萊徹上方。翠木玲瓏藏寶界。白煙濃淡鎖華堂。書名越豔誰興發。角動單于自感傷。山似臥龍天似水。卻疑身在海中央。

其二

縵繞千重雨後涼。月含秋色上東方。風催絡緯歸金井。月轉檀欒蔭畫堂。游目騁懷佳興發。感時撫事壯心傷。歸來枕簟清無夢。臥看明星到未央。

次韻公關即席呈太虛

與君鄰並共烟霞。乘興時時過我家。更漏一新聞曉角。門關數級看秋花。湖山對值全如買。風月相期不用除。賴有醉毫吟更苦。他年分作句圖誇。

次韻公關將受代書蓬萊閣

城連湖岸水爲關。旦暮樵風自往還。龜負寶林新佛地。龍蟠使宅老仙山。平生仕宦今何得。終日登臨獨未閑。歲滿徘徊難遽別。就中瀟洒異人間。

次韻公關聞角有感

一聽胡笳動越吟。聲潛地底氣逾深。千宮月色單于曲。萬里天光魏闕心。秉燭何人猶把盞。挑燈有女正穿針。早寒時節黃昏後。更逐西風應遠砧。

寄公關

憶昔都門手一攜。春禽初向草蘿啼。夢回金殿風光別。吟到銀河月影底。舞急錦腰迎十八。酒醒玉蕊照東西。何時得遂扁舟去。邂逅從君訪剡溪。

呈公關

東歸行路歎賢哉。碧落新除寵上才。白傅林塘隨畫去。吳山花鳥入詩來。唱酬自有微之在。談笑應容逸少陪。除此兩翁相見外。不知三徑爲誰開。

奉和辛老

童子何知幸最深。久班籍湜奉登臨。挾經屢造芝蘭室。揮麈常聆金玉音。黃卷香焚春晝晚。絳紗人散夜蕭森。明朝只恐絲綸下。回首青雲萬里心。

中秋口號

井引一云雲
山閣白話

伏以四難并得。既爲尊俎之佳期。五福具膺。實號摺紳之盛事。矧中秋之屆候。宜公燕之交歡。恭惟判府大資。身遇聖神。家傳將相。時應半千之運。論歸尺五之天。姓名久在於金甌。方面暫分於玉節。浮塔飛閣。引南國之佳人。豪竹哀絲。奏西園之清夜。雲山簷楯。接低空。公宴初開。氣鬱葱。照海旌旛。秋色裏。激天鼓吹。月明中。香槽旋滴。珠千顆。歌扇驚圍。玉一叢。二十四橋人望處。台星正在廣寒宮。

致政通議口號

井引一作
秋燕口號

竊以五福具膺。實摺紳之盛事。四難并得。亦尊俎之佳期。恭惟致政通議。馬鶴英姿。鼎槐華胄。身見六朝之盛。位登兩省之崇。北陌東阡。時命青牛之駕。左圖右史。日從赤松之遊。判府左丞。神嶽殊鍾。星躔異稟。方面雖分於玉節。姓名已覆於金甌。舉白飛觴。極水陸四方之饌。彈絲擊石。盡賓主一時之歡。秋空畫隼。照新晴。符隱庵前小隊停。玉卮金醪。通繡綵。鳳笙龍管。入青冥。觀粧醺酒。花侵席。寶獸呀香霧。滿庭。太史應占豫州分。上台星近老人星。

口號

井引

美酒忘憂之物。流光過隙之駒。不稱人心。十事常居八九。得開口笑。一月亦無二三。莫思身外無窮。且賭

尊前見在功名富貴。何異楚人之弓。城郭人民。問取遼東之鶴。付與香鈿畫鼓。盡歡美景良辰。欲奏長謠。聊陳短韻。

平原居士今無影。鸚鵡空洲誰舉杯。猶有漁陽搥檣鼓。爲君醉後作輕雷。

悼王子開五首

其一

我昔官房子。長懷忠穆賢。里無行馬第。山有臥牛阡。當代三公後。惟君五福全。桐棺遠歸祔。追舊幾潸然。

其二

早爾金閨彥。頤然玉笏班。周旋三友益。零落十年間。轆轤靈輻動。悠揚素旆還。暮年還抱愛。應復辨追攀。

其三

蕭散竹林風。平生約略同。官班嵇叔夜。年輩晉安豐。民詠濡須政。朝推胸臆功。九原無復作。埋玉恨何窮。

其四

南浦維舟訪東堂。抵榻眠。後期猶指日。輕別遂終天。墨妙今初貴。詩名久已傳。清風如未墜。諸子更翩跹。

其五

已矣知無憾。賢愚共此途。白駒馳白日。黃髮掩黃壚。和氏終歸趙。干將不葬吳。犖犖如可彊。猶擬冀生芻。

淮海後集卷四

詩

秋興九首

擬韓退之

逍遙北窗下。百事遠客慮。無端葉間蟬。催促時節去。愁起如亂絲。縈纏不知緒。日月豈得已。還復役朝暮。人生均有得。悲歎我不悟。春秋自天時。感憤亦真趣。

擬孟郊

曉風有暴信。暮蟬無好聲。曉風與暮蟬。自與時節爭。獨客辭故鄉。持車謁梁城。梁城道迢遞。區區役吾生。不如歸舊山。藜藿安性情。

擬韋應物

坐投林下石。秋聲出疎林。林間鳥驚棲。豈獨傷客心。物亦有代謝。此理共古今。鄰父縮新醅。林下邀同斟。癡兒踏吳歌。姪姪足訛音。日落相攜手。涼風快虛襟。

擬李賀

魚鱗盡空排嫩碧。露桂梢寒挂團壁。白蘋風起吹北窗。尺鯉沉沒斷消息。燕子將鵲欲歸去。沈郎病骨驚遲暮。濃愁茫茫寄何處。萬里江南芳草路。

擬李白

芙蓉露濃紅壓枝。幽禽感秋花畔啼。玉人一去未回馬。梁邊燕子三見歸。江頭白蘋老波底。尺書不來空相望。斜吹疎雨濕秋江。霜風暗引芙蓉香。石上蒼蘚三尺長。綠頭鴨兒棲萍草。採蓮女郎笑花老。木蘭船上動江水。不覺鴛鴦帶波起。

擬玉川子

南州有病客。起臥北窗下。玉兔曙光照清夜。故人別我京洛遊。不寄一行三改秋。秋色變冷客裘薄。漸覺衣袂寒飈颭。作詩欲寄君。未語先有愁。不如呼童起。危坐北窗下。一杯寬我千日憂。眼前俗事何擾擾。此夕盡向杯中休。何必懷黃金印兮。爵通侯。

擬杜子美

紫領寬袍漉酒巾。江頭蕭散作閑人。悲風有意催林葉。落日無情下水濱。車馬憧憧諸道路。市朝袞袞共埃塵。覓錢稚子啼紅頰。不信山翁餓箇貧。

擬杜牧之

鼓鼙夜戰北窗風。霜葉鋪堦亂紅。一段新愁驚枕上。幾聲悲鴈落雲中。眼前時節看馳馬。日下生涯寄斷蓬。弟妹別來勞夢寐。杳無消息過江東。

擬白樂天

不因霜葉辭林去。的當山翁未覺秋。北里酒錢煩屢索。南州詩債懶頻酬。欲歌金縷羞紅粉。擬插黃花避

白頭底事登臨好時節。等閑收拾許多愁。

金山晚眺

西津江口月初弦。水氣昏昏上接天。清渚白沙茫不辨。只應燈火是漁船。

病中

疎簾薄幔對青燈。鸚鵡喧喧自轉更。風雨渺漫人臥病。地爐湯鼎更悲鳴。

開鴈懷邵仲恭

楚澤吳天去未遲。煩君且傍蒜山飛。白袍居士如相問。爲說緇塵欲滿衣。

冬蚊

蚤蠶蜂虻罪一倫。未如蚊子重堪噴。萬枝黃落風如射。猶自傳呼欲噬人。

白馬寺晚泊

濛濛晚雨暗回塘。遠樹依微不辨行。人物漸稀疎磬斷。綠蒲叢底宿鴛鴦。

晉上感懷

七年三過白蘋洲。長與諸豪載酒游。舊事欲尋無處問。雨荷風蓼不勝秋。

和程給事贈虞道判六首

刀圭雲母具晨母。門對三層步斗壇。夜考鶴經分七九。曉占歲氣辨艸丹。火聚交梨近可湊。不須地肺及天壇。龜藏坎海毛皆綠。鳳宿離宮色自丹。

紫府沉沉掩夜闌。竹陰清掃月中壇。歲星偷得桃枝碧。董奉栽成杏子丹。
囊中王色已經淪。醉拂絲桐坐杏壇。應笑僂游塵滓客。鬢毛蕭瑟事鉛丹。
漢武遊心縹緲間。文成五利盡登壇。何如屈曲韓夫子。不羨神君白玉丹。
使君本住道家山。時訪元都太古壇。陰惠已能追許令。治功不獨過韋丹。

處州閑題

清酒一杯甜似蜜。美人雙鬢黑如鴉。莫誇春色欺秋色。未信桃花勝菊花。

春詞絕句五首

蒲萄欄暖薰薰微。紅日窺軒睡覺時。人倦披衣雙燕出。青絲高冒木蘭枝。
弱雲亭午弄春嬌。高柳無風安翠條。懶讀夜書搔短髮。隔垣時聽賣餚簫。
都城春富百花披。長憶人歸駐馬時。淺色御黃應好在。爲誰還發去年枝。
風驅白雨洗園林。蔽地飛花一寸深。狂紫浪紅俱已矣。老春雖在亦何心。
顛毛漸脫風情少。匣劍空存俠氣銷。人遠地偏無酒肉。春深花鳥謾相撩。

秋詞二首

雲惹低空不更飛。班班紅葉欲辭枝。秋光未老仍微暖。恰似梅花結子時。
無數青莎繞玉階。夕陽紅淺過牆來。西風莫道無情思。未放芙蓉取次開。

齊逸亭

饑發郎君更不歸。故亭蕭瑟異當時。玉笙金管渾如夢。只有梅花三四枝。

春日

殘臘渺茫雲外日。新春彷彿夢中來。雪霜便覺都無力。只見桃花次第開。

雪中寄丹元子

陰風一夜攪青冥。風定紛紛雪片零。想見玉清真境上。白虛光裏誦黃庭。

宿乾明方丈

漫天白雪無端現。佛室夜艾烏更啼。相逢解頤足自慰。勿語俗子念心機。

新開湖送孫誠之有龍見于東北因成絕句

狂客走影暗悠悠。菡萏吹風五月秋。黃綬不爲無氣概。蒼龍隨尾送行舟。

呈李公擇

青箋壁處銀鈎斷。紅袂分時玉筍懸。雲腳漸收風色緊。半規斜日射歸船。

落日馬上

日落荒阡白霧深。紫騮嘶顧出疎林。回頭已失來時路。杳杳金盤墮翠岑。

次韻參寥三首

武陵漁子入花源。但見秦人不得仙。會有黃鸝鳴翠柳。何妨白眼望青天。

長安仕路與雲齊。倦僕羸驂不可躋。但得玄暉曾折簡。何須平子更安題。

且折花枝醉復醒。人間時節易崢嶸。屠龍肯自羞無用。畫虎從人笑不成。
和書天慶觀賀祕監堂三首

老仙舊地枕東城。古木參天警書聲。我亦頗爲方外友。風流何必並時生。
史君平昔慕高情。一到祠堂意一新。戶外黃冠應指點。公應便是謫仙人。
衣屨蕭條氣久清。豪家門館未嘗行。朱甍碧瓦何從得。疑有陰兵夜助成。
和書觀妙菴

龍瑞宮中種玉人。誅茅結室傍秋雲。自言洞裏山川別。此處千分未一分。
早春題僧舍

東園紫梅初破蕊。北澗淥水方通流。歸去一春花月夢。定應常在此中遊。
盆池釣翁

誰刻仙材作釣翁。尺池終日釣微風。令人卻憶鴟夷子。散髮五湖狂醉中。
賞醪醕有感

春來百物不入眼。唯見此花堪斷腸。借問斷腸緣底事。羅衣曾似此花香。
首夏

節物相催各自新。癡心兒女挽留春。芳菲過盡何須恨。夏木陰陰正可人。

淮海後集卷五

雜文

代蘄州守謝上表

愚罪著明。當以萬死。聖恩寬大。尙假一麾。顧惟昧冒之深。第積戰兢之至。伏念臣不學無術。寡偶少徒。荷先帝之誤知。繇常員而擢用。始欲悉力而舉職。莫知長慮以佐時。自取悔尤。至煩揮黜。責其妄作。便可屏之遠方。憫其知非。猶當投於散地。敢圖生死而肉骨。尙容宣化以承流。況臣粵自去冬。嘗陳愚懇。願歸使節。求綰郡章。雖此左遷。正符宿願。恩既深而逾望。感亦極而難言。此蓋伏遇皇帝陛下大德海涵。至仁天覆。謂災眚之可赦。以過失爲當憐。寬其未棄之誅。開以自新之路。辨之不早。嗟已迫於桑榆。來者可追。幸未填於溝壑。誓捐軀幹上報恩私。

代程給事乞祝聖表

本州管內舊有應天寺者。造於宋元徽中。其地據寶林山巔。南直秦望。北負臥龍。蔽山挾其左。鑑水趨其前。圓視井邑。如閱圖畫。越之形勝。十得六七。比於熙寧十年八月遇火。金石土木之觀。一夕殆盡。樓觀宮室。化爲丘墟。父老過之。徜徉悼歎。若失所依憑者。因相率詣州自陳。願以私錢修復故寺。本州尋具其事。上聞。仍乞易爲十方。蒙朝廷報可。賜號寶林禪院。於是郡之衣冠縉素。無不悅豫鼓舞。以謀報上。因大出力財。爭先請奮。浮圖棟宇。次第告成。曾未踰年。已復舊觀。蓋所據之地勝。故興也易。所遭之時盛。故成也。

速不然何以至是哉。謹按寶林禪院其地本名龜山。前世文士見於篇章。上有鰻井。歲旱禱雨輒應。臣等竊以爲龜神物也。有先事之智而壽齡千歲。鰻龍類也。有施澤之仁而功被萬物。位正南方。與時相見。勢出人境。足以有臨。稽之於名。効之於物。參之於方位。考之於形勢。而酌之於民情。理從事順。實宜永爲頌祝。陛下聖壽之地。臣等自今後每遇同天節。只於本院啓建道場。及禱祠雨澤。吉祥齋供。其餘宮中道場。並不令於本院啓建。夫下達士民之願。上報君父之恩。臣子之職也。臣等荷國厚恩。無以答生成之萬一。庶幾因緣塔廟。少伸犬馬之誠。仰瞻闕庭。不勝大願。伏望聖慈。特賜俞允。

坤成節功德文疏

寶曆開祥。爰屬補天之運。金行御氣。適當夢帝之期。躬詣精廬。妙修勝會。致上方香積之飯。閱西土貝多之文。庶憑調御之緣。少効華封之祝。太皇太后伏願睿圖鞏固。宸算增隆。日月無私。永照臨於下土。風雲不間。長威會於中天。

代答范相公啓

堯天

器兼文武。道備天人。始列周行。綽有棟梁之器。及參大政。鬱爲社稷之臣。果振家聲。遂當國相。昔韋平嗣興於西漢。袁楊繼起於東京。張公錫延賞之名。陸氏取象先之意。雖云華族。未必熙朝。然猶前史以爲美談。當世謂之榮事。固未有百年遇太平之運。四世膺爰立之求。以今言之。一何盛也。某夙登門。叨嘗頌威容。念班謁以無由。第承風而竊抃。

賀孫中丞啓

光奉明恩。進陞中憲。伏惟慶慰。恭惟中丞侍郎。受天間氣。爲世真儒。力足以扶顛持危。器足以致遠任重。巍然如衣服之有冠冕。卓爾若鳥魚之有鳳鯢。三朝充諫諍之官。奮身不顧。七郡任蕃宣之寄。爲民所思。動靜不失其時。遜逆必求諸道。比支物望。簡在上心。粵自貳卿。遂登執法。嚴霜被野。旣知松柏之後凋。猛獸居山。將見藜藿之不采。某叨持符節。久遠門闌。

賀吏部傅侍郎啓

光膺帝命。進貳天官。云云。某官道術淵微。器猷宏博。更險夷而不測其操。踐中外而不易其心。漢節初歸。常折董宏之妄。楚郊臥治。尤推汲黯之忠。方傳報政之成。已聽除書之下。亟辭右輔。復踐中臺。邦人遮轍。以願留朝士。舉酒而相賀。吏曹三綜。旣知水監之無私。王體一謀。當見鈞衡之益重。某屬輶軺傳。阻造門闌。

代何提舉賀范樞密啓

光膺帝命。進貳中樞。碩輔登崇。溥天均慶。竊以天運無積。蓋由八柱之仰成。歲功不虧。亦自四時而分治。矧鳩皇補天之際。當商老和羹之初。儻非心德之素同。難冀事功之必立。伏惟某官器兼文武。學備天人。雖小善而必爲。臨大節而不奪。入參臺省。佇聞折檻之風。外總戎機。寢罷爭桑之釁。負謗傷而精神益勵。處閑散而聞望愈隆。逮神聖之纂臨。屬風雲之感會。念昔仁祖虛懷於慶曆之間。惟時先公奏對於天章之下。謂道可行於反掌。而世亦至於容刀。盛世難逢。事空傳於故老。嗣賢復出。天實慰於斯民。旣被召以

旋歸。遂干霄而直上。千尋廣廈。欣然慰多士之心。萬里長城。足以制四夷之命。某夙登門。久曠書牋。方從沙汰之餘。未卜棲翔之所。側聞進拜。倍切驩愉。巖石雖瞻。尙鬱搢紳之論。袞衣遂有。方隣區夏之情。

賀門下呂僕射啓

仲微

伏審光奉明恩。進陞左輔。伏惟慶慰。恭以某官當世大儒。斯民先覺。毀譽莫爲之損益。窮通靡得而變渝。北平如高山深林。人何可測。巨源若渾金璞玉。器孰能名。卓乎在搢紳之中。屹然有公輔之望。果踐西臺之峻。遂躋端揆之崇。邸音喧騰。士類交慶。納忠有素。詎須德裕之六箴。應變無方。不止姚崇之十事。

謝潁州呂吏部啓

叨奉宸恩。謬當藩郡。境預四鄰之末。潤霑九里之餘。憑几占書。未進河南之牘。朵雲號體。俄蒙郇國之函。仰荷謙沖。退增悚愧。恭以某官器周事變。學造淵微。出四世五公之門。遇千載一時之運。文辭則操觚立就。政事則投刃皆虛。荀氏八龍。盡繼高陽之美。河東三鳳。尤推鸞鷟之奇。會公旦之相周。俾伯禽而侯魯。布宣詔令。已成帥帥之功。近省君親。行陟股肱之任。某承風茲久。覲德未遑。企頌之懷。敷宣罔既。

答丁彥良書

某啓。辱書及詩。備悉雅旨。且承邇來爲況甚休。以感以慰。竊味詩之大意。率多辛酸耿愴之旨。君生長僚富貴。而喜作寒士語。何耶。因知詩非能窮人。詩窮然後工。得非政欲以此合古人語乎。兼審薄挂吏議。小累不足以玷遠猷。毋甚快快也。知罷官里閭。慕義嗜學。是所以增其志尙爾。白玉微瑕。千丈松磳。不害。

他日爲大器。駢馳之士。自有御之者。幸順時自愛。區區不宜。某再拜。

與許州范相公

某再拜。安撫相公閣下。某淮海一介之士。行能無取。比因緣科第。獲列仕版。又屬朝廷復置賢科。而一二邇臣。猥以充賦。名實乖戾。果致多言。相公當國。憐其孤單。不卽聞罷。使得自便。引疾而歸。僥倖深矣。比遇相公。均逸藩輔。而某承乏之地。實在節制之下。疵賤無介紹。不敢以書自通。眷眷私懷。何以云喻。豈圖相公過有採聽。首賜論薦。使備著述之科。檄書初至。發函伏讀。且喜且懼。蓋相公於某。昔既有保全之賜。今又有論薦之恩。顧惟狂愚。何以辱此。屬拘官守。不獲進謝門闕。又不敢具啓事。以敘悃愮。區區俗禮。非國士所以報知己者也。惟相公裁察。

祭監稅主簿文

維年月日。具銜姓名。謹以清酌庶羞之奠。致祭于歿故監稅主簿之靈。嗚呼。賢才懿德。宜顯周行。以君德厚。宜享壽康。仕旣未達。人其云亡。顧天理之莫究。茲僚友之永傷。嗚呼。西風蕭颯。長夜淒涼。靈車戒道。丹旌飛揚。有殺在俎。有酒盈觴。臨岐仲奠。歸安故鄉。尙饗。

淮海後集卷六

雜文

雜說

唐杜淦，江夏人也。自罷漢陰令，居泗水上。烈日笠首，親督耕夫。一年而食足，二年而衣食兩餘，三年而屋室完新。六畜肥繁，器用皆備。自墾荒起家，十五年爲富家翁，不假一人之力，一毫之助。彼嘗謂人曰：夫忍恥入仕，不困妻子衣食者幾希。彼忍恥我勞力，皆衣食耳。顧我何如？由功名之士觀之，則誠爲拘繫駒促人也。若夫恬於進取，安分潔己者，蓋有取焉爾。

通事說

文以說理爲上，序事爲次。古人皆備而有之。後世知說理者，或失於略事；而善序事者，或失於悖理。皆過也。蓋能說理者，始可以通經；善序事者，始可以修史。

蠶書

予閑居，婦善蠶，從婦論蠶，作蠶書。

考之禹貢，揚梁幽雍，不貢繭勿。竟，筐纖文。徐，筐玄纖纈。青，筐底纈域紉。豫，筐纖纈。青，筐縹絲。皆繭物也。而桑土旣蠶，獨言於竟。然則九州蠶事，竟爲最乎？予游濟河之間，見蠶者豫事時作，一婦不蠶，比屋習之。故知竟人可爲蠶師。今予所書，有與吳中蠶家不同者，皆得竟人也。

種蠶

蠶之日聚蠶種沃以牛溲浴于川毋傷其藉迺縣之始審臥之五日日色青六日白七日蠶已蠶尙臥而不傷。

時食

蠶生明日桑或柘葉風戾以食之寸二十分晝夜五食九日不食一日一夜謂之初眠又七日再眠如初既食葉寸十分晝夜六食又七日三眠如再又七日若五日不食二日謂之大眠食半葉晝夜八食又三日健食乃食全葉晝夜十食不三日遂繭凡眠已初食布葉勿擲擲則蠶驚毋食二葉

制居

種變方尺及乎將繭乃方四丈織萑葦範以蒼萑竹長七尺廣五尺以爲筐建四木宮梁之以爲槌縣筐中間九寸凡槌十縣以居食蠶時分其居葉其葉餘以時去之萑葉爲籬勿密屈葉之長二尺者自後茨之爲簾以居繭蠶凡繭七日而採之居蠶欲溫居繭欲涼故以萑鋪繭寒之以風以緩蛾變

化治

常令養繭之鼎湯如蟹眼必以筯其緒附于先引謂之饅頭毋過三系則系蠶不及則脆其審舉之凡系自鼎道錢眼升於鑠星星應車動以過添梯乃至於車

錢眼

爲版長過鼎面廣三寸厚九黍中其厚插大錢一出其端橫之鼎耳後鑲以石緒總錢眼而上之謂之錢

眼

鎖星

爲三蘆管。管長四寸。樞以圓木。建兩竹。夾鼎耳。縛樞於竹中。管之轉。以車下直錢眼。謂之鎖星。

添梯

車之左端置環。繩其前。尺有五寸。當車牀左足之上。建柄長寸有半。匿柄爲鼓。鼓生其寅。以受環繩。繩應車運。如環無端。鼓因以旋。鼓上爲魚。魚半出鼓。其出之中。建柄半寸。上承添梯。添梯者二尺五寸片竹也。其上桵竹爲鈎。以防系窳。左端以應柄對鼓爲耳。方其穿以閑添梯。故車運以牽環繩。繩簇鼓。鼓以舞魚。魚振添梯。故系不過偏。

車

制車如轆轤。必活其兩輻。以利脫系。

禱神

臥種之日。升香以禱天。駟先蠶也。割雞設醴。以禱婦人。寓氏公主。蓋蠶神也。毋治堰。毋誅草。毋沃灰。毋室入外人。四者神實惡之。

戎治

唐史載。于闐初無桑。丐鄰國不肯出。其王卽求置婚。許之。將迎。乃告曰。國無帛。可持蠶自爲衣。女聞。置蠶帽。絮中。關守不敢驗。自是始有蠶。女刻石約無殺蠶。蛾飛盡。乃得治繭。言蠶爲衣。則治繭可爲絲矣。世傳

繭之未蠶而竅者不可爲絲。頃見鄰家誤以竅繭雜全繭治之。皆成系焉。疑蠶蛻之繭也。欲以爲絲。而其中空不復可治。嗚呼。世有知于繭治絲法者。肯以教人。則貨蠶之死可勝計哉。予作蠶書。哀蠶有功而未免。故錄唐史所載以俟博物者。

書丁彥良明堂議後

祀國事之大者。歷世洪儒碩生。議論考訂。往往自相違戾。丁俠以世家子。早假蔭以官。少年彊學。援質有根抵。訶詆前載。惜乎未能以此獻諸朝。得付有司禮官博士相與校正。以備一代闕文。君不能姑愛惜。遵養以待云。

錄龍井辯才事

熙寧九年。秀州嘉興縣令陶象有子。得疾甚異。形色語笑非復平人。令患之。乃大出錢財。聘謁巫祝。厭勝百方。終莫能治。是歲辯才法師元淨。適以事至秀。法師高僧也。隱於錢塘之天竺山。傳天台教。學者數百人。又特善呪水。疾病者飲其所呪水。輒愈。吳人尊事之。令素聞其名。卽馳詣師。具狀告曰。兒始得疾時。見一女子自外來。相調笑。久之俱去。稍行至水濱。遺詩曰。生爲木卯人。死作幽獨鬼。泉門長夜開。衾幃待君至。自是屢來。且有言曰。仲冬之月。二七之間。月盈之夕。車馬來迎。今去妖期逼矣。未知所處。願賜哀憐。師乃許諾。因杖策從至其家。除地爲壇。設觀音像於中央。取楊枝澆水。灑而呪之。三邊壇而去。是夜兒寢安。然不復如他時矣。明日復來。結跏趺座。引兒問曰。汝居何地而來至此。答曰。會稽之東。下山之陽。是吾宅。古木蒼蒼。師又問汝姓誰氏。答曰。吳王山上無人處。幾度臨風學舞腰。師曰。汝柳姓乎。乃驪然而笑。師

良久呵曰。汝無始已來。迷已逐物。爲物所轉。溺於淫邪。流浪千劫。不自解脫。入魔趣中。橫生災害。延及無辜。汝今當知。魔卽非魔。魔卽法界。我今爲汝。宣說首楞嚴祕密神呪。汝當諦聽。痛自悔恨。訟既往過愆。返本來清淨覺性。於是號泣不復有云。是夜謂兒曰。辯才之功。汝父之虔。無以加焉。吾將去矣。後二日復來曰。久與子遊。情不能遽捨。願一舉觴爲別。因相對引滿。旣罷。作詩一章曰。仲冬二七是良時。江下無緣與子期。今日臨岐一盃酒。共君千里遠相離。遂去不復見。予聞其事久矣。元豐二年。見辯才於龍井山間之信然。

書王氏齋壁

皇祐元年。余先大父赴官南康。道出九江。余實生焉。滿歲受代。猶寓止僧舍。未幾代者卒。叔瞻之先君來領其職事。通家相好也。至和元年。叔瞻始生於南康。後予迎老母來爲汝南學官也。而叔瞻亦奉大夫人閒居於郡之西郭。時余之先大父母先人皆捐館。而叔瞻之先君亦沒於瀘州。皇祐逮今四十一年。中間豐瘡得喪。死生休戚。不可悉記。獨兩家之孤。各奉其母。相遭于此。甚可悲也。

題彭景山傳神

內殿崇班致仕彭崇仁字景山。胸中有韜略。吏事精密。所至士大夫翕然稱之。年四十不幸喪明。家居無餘。而目不可治。如老驥伏櫪。志未嘗不在千里。聞北風則耳聾然。自道觀之物。無幸不幸。以得喪觀之。豈異世有所負耶。然人之有德慧智術者。常存乎疢疾。惟深也能披剝萬象而見已。安知景山不得之沉冥中耶。

淮海閒居集序

元豐七年冬余將西赴京師。素文囊於囊中。得數百篇。辭鄙而倜於理者。輒刪去之。其可存者。古律體詩。百十有二。雜文四十有九。從遊之詩。附見者五十有六。合二百一十七篇。次十卷。號淮海閒居集云。

清和先生傳

清和先生。姓甘名液。字子美。其先本出於后稷氏。有粒食之功。其後播秦。或居於野。遂爲田氏。田爲大族。布於天下。至夏末世。衰有神農之後利。其資率其徒往。俘於田而歸。其倔彊不降者。與彊而不釋甲者。皆爲城旦。春賴公孫杵臼。審其輕重。不盡碎其族。徙之陳倉。與麥氏谷氏鄰居。其輕者猶爲白粲。與鬼薪侖。已而逃乎河內。又移于曲沃。曲沃之民。悉化焉。曲沃之地。近於甘。古甘公之邑也。故先生之生。以甘爲氏。始居於曹。受封於鄭。及長。器度汪洋。澄之不清。撓之不濁。有醞藉涵泳經籍。百家諸子之言。無不濫觴。孟子稱伯夷清。下惠和。先生自謂不夷不惠。居二者之間。而兼有其德。因自號曰清和先生云。士大夫喜與之游。詩歌曲引。往往稱道之。至於牛童馬卒。閭巷倡優之口。莫不羨之。以是名漸徹於天子。一召見。與語。竟日上。熟味其旨。愛其淳正。可以鎮澆薄之徒。不覺膝之前席。自是屢見於上。雖郊廟祠祀之禮。先生無不預其選。素與金城賈氏及玉卮子善。上皆禮之。每召見先生。有司不請。而以二子俱見。上不以爲疑。或爲之作樂。盛饌以待之。歡甚。至於頭沒杯案。先生旣見寵遇。子孫支庶出爲郡國二千石。往往皆是。至於十室之邑。百人之聚。先生之族無不在焉。昔最著聞者。中山宣城湓浦。皆良子弟也。然皆好賓客。所居冠蓋駢集。賓客號呶。出入無節。交易之所在。委積由是上疑其濁。小人或乘間以賄入。欲以逢上意而取寵。

一日上問先生曰。君門如市。何也。先生曰。臣門如市。臣心如水。上曰。清和先生。今乃信其清和矣。益厚遇之。由是士大夫愈從先生游。鄉黨賓友之會。咸曰。無甘公而不樂。既至。則一坐盡傾。莫不注揖。然先生遇事多不自持。以待人斟酌。而後行。嘗自稱沽之哉。沽之哉。我待價者也。人或召之。不問貴賤。至於斗筲之量。絮瓶之智。或虛已來者。從之如流。布衣寒士。一與之遇。如挾纊。惟不喜釋氏。而僧之徒好先生者。亦竊與先生游焉。至於學道隱居之士。多喜見先生。以自晦。然先生愛移人性情。激發其膽氣。解釋其憂憤。可謂能令公喜。能令公怒者邪。王公卿士。如灌夫。季布。李景儉。桓彬之徒。坐與先生爲黨。而被罪者。不可勝數。其相歡而奉先生者。或至於破家敗產。而不悔。以是禮法之士。疾之如讐。如丞相朱子元。執金吾劉文叔。郭解。長孫登。皆不悅。未嘗與先生語。時又以其士行。或久。多中道而變。不承於初。咸毀之曰。甘氏孽子。始以詐得終。當以詐敗矣。久之。或有言先生性不自持。無大臣輔政之體。置之左右。未嘗有沃心之益。或虞以虛閑廢事。上由此亦漸疎之。會徐邈稱先生爲聖人。上惡其朋比。大怒。遂命有司以光祿大夫秩就封宗廟祭祀。未嘗見。遂終於鄭。仕於郡國者。皆不奪其官。初先生旣失寵。其交游往往謝絕。甚者至於毀棄素行。以賣直自售。惟吏部尙書畢卓。北海相孔融。彭城劉伯倫。篤好如舊。融嘗上書辨先生之無罪。上益怒。融由此亦得罪。而倫又爲之頌。與當世爲有。故不著。今掇其行事大要者。著于篇。

太史公曰。先生之名見於詩書者多矣。而未有至公之論也。譽之者美逾其實。毀之者惡溢其真。若先生激發壯氣。解釋憂憤。使布衣寒士樂而忘其窮。不亦薰然慈仁君子之政歟。至久而多變。此亦中賢之疵也。孔子稱有始有卒者。其惟聖人乎。先生何誅焉。予嘗過中山。慨然想先生之風聲。恨不及見也。乃爲之

傳以記。

法雲寺長老然香會疏文

竊以香者妙通法性。冥動開機。大則香積如來。令天人而入戒律。次則香嚴童子。得羅漢而證圓通。覺至性之清嚴。破塵寰之濁穢。肆求善友。同結勝緣。漸沉水之蜜圓。斥聚膏之昏鈍。規模既遠。誓愿尤長。若秣若圓。得無礙法。非煙非火。轉不退輪。偶就印以成文。常干空而作蓋。無前後去來之際。有解脫知見之因。瞋乎若光明之雲。佳哉如鬱葱之氣。反聞聞性。八百之功德。以成自覺。覺他。億萬之河沙斯遍。

越州請立程給事祠堂狀

浙水之東。七州獨越爲都會。凡七州之軍事督焉。其地西帶江。北被海。多雄山傑澤。有桑麻魚稻。藤蔞竹箭之饒。土沃而流。水清而不迫。非舟車足力所會。故其民喜耕耨。勤織紉。尊本而薄末。狡獪詆欺之弊。視他州爲少。然以險阻之故。豪強惡少。跌宕不逞之民。一失其業。則往往什聚伍行。剽攘攻劫。於江海之上。不時去之。則蔓延而成大盜矣。爲太守者。審知風俗之厚。刑政並修。則一方可以指麾而治。不然雖殫力勞心。猶無益也。熙寧十年。詔以給事中集賢殿修撰。廣平程公知軍州事。公素以治行稱。天下越人無不踴躍竦企。願見公之所爲。及至。政尚簡肅。不爲苟且苛細之事。事至而後必行。亦無所假借。發隱擿伏。敏捷如神。每得所謂豪強惡少。跌宕不逞之民。草斬而獸逐之。至斷絕乃已。於是距吳際閩禁。千里肅然。盜賊不敢發。川行途止。如卽其家。獄訟衰息。風雨時至。仍歲大穰。乃禮賢俊。仁老孤。簡練士卒。繕修宮寺。至於郵亭刻漏。爲之一新。頽廢偃僵。斬然俱起。然後知公之才。所遇縱橫無窮。其所厭伏東西。逆銷變故於

未形者多矣。非特越人受其賜也。使行且大用於朝。推其道於天下。則其所就者又可量耶。先是太子少保南陽趙公有惠政於越。既去而公承其後。故議者謂近世越州之政。未有如二公者。南陽公嘗命畫史圖太子少師天水趙公并公與已游從之像。號三老圖。而越之好事者。遂作三老堂以實之。元豐二年。公還朝。郡之衣冠縉黃耆艾之士若干人。乞留於郡。使者三爲之上。不報。因相與泣曰。公去矣。其像雖存於三老堂。然吾人之心未厭也。聞公嘗帥洪福廣三郡。三郡皆有生祠。豈獨無有。今寶林院者。公之所興建也。若卽其地爲堂。立公之像。如三郡故事。以慰吾人之思。不亦可乎。衆曰。然。於是又以狀白使者。請立公之祠堂焉。是時某適自淮南來。省親將還。越人謂某曰。吾州更饑歉札瘥之後。程公實撫養而教誨之。去年冬。福州太守司諫孫公嘗道于此。具見其事。今祠堂成有日矣。謀爲記。宜莫如孫公者。聞子與孫公鄉里。且門人也。盍撫厥實。以爲我請乎。某既歎程公之政。有以媚于民。又嘉越人能大其施而推報之也。乃爲論次其事。并州之風俗。具而載之。以備孫公之采擇焉。

精騎集序

予少時讀書。一見輒能誦。暗疏之亦不甚失。然負此自放。喜從滑稽飲酒者游。旬朔之間。把卷無幾日。故雖有彊記之力。而常廢於不勤。比數年來。頗發憤自懲艾。悔前所爲。而聰明衰耗。殆不如曩時十一二。每閱一事。必尋繹廢終。掩卷茫然。輒復不省。故雖然有勤苦之勞。而常廢於善忘。嗟夫。敗吾業者。常此二物也。比讀齊史。見孫奉答邢詞云。我精騎三千。足敵君羸卒數萬。心善其說。因取經傳子史事之可爲文用者。得若干條。勒爲若干卷。題曰精騎集云。噫。少而不勤。無如之何矣。長而善忘。庶幾以此補之。

故龍圖閣直學士中大夫知成都軍府事管內勸農使充成都府利州路兵馬鈐轄上護軍隴西郡開國侯食邑一千一百戶食實封三百戶賜紫金魚袋李公行狀曾祖諱宗誼故不仕祖諱知至故不仕父諱東故任江寧府溧水縣尉累贈特進

南康軍建昌縣李常字公擇年六十四李氏宗出唐宗室郇公諱遠祖濤五代時號稱名臣仕皇朝爲兵部尙書封莒國公莒公少時仕於湖南氏有一子留江南公其裔孫也故今爲南康建昌人公少警悟好學彊記爲文章捷敏初若不經意而比成粲然屬寓深遠皇祐中登進士甲科授防禦推官權江州軍事判官丁昌源郡太夫人憂解官又丁光祿公憂服闋權宜州觀察推官監漣水軍轉般倉改大理寺丞知洪州奉新縣未行用韓公獻肅薦爲三司檢法官神宗卽位詔大臣舉館職曾宣公以公應詔召試學士院除祕閣校理編校史館書籍兼太常博士兼史館檢討置三司條例司檢詳官看詳中書條例權判尙書考功改右正言同管勾國子監公事是時王荊公輔政始作新法諫官御史論不合者輒斥去公上疏力詆其非以爲始建三司條例司雖致天下之議而善士猶或與之至於均輸之論與青苗之法立公然取息傳會經旨以爲無嫌則天下固已大駭而善士亦不復與矣時荊公之子雱與溫陵呂惠卿皆與聞國論凡朝廷之事三人者參然後得行公言陛下與大臣議某事安石不可則移而不行安石造膝議某事安石承詔頌焉呂惠卿獻疑則反之詔用某人安石惠卿之所可雱不說則又罷之孔子曰祿去公室政在大夫陪臣執國命今皆不似之耶而其論青苗尤爲激切至十餘上不已於是落職通判滑州歲餘復職知鄂州徙知湖州遷尙書祠部員外郎賜五品服徙知齊州齊故多盜公至痛懲艾之論報無虛日

盜猶不止。他日得黠盜。察其可用。刺爲兵。使直事鈴下間。間以盜發輒得。而不衰止之故。曰。此縣富家爲之囊。使盜目相推爲甲乙。官吏巡捕及門。擒一人以首。則免矣。公曰。吾得之矣。乃令得藏盜之家。皆發屋破柱。盜賊遂清。始公在武昌。吳興政尙寬簡。日與賓客縱酒笑詠。吏民安樂之。郡以大治。於是世知公之才。所值無不可也。屬決河灌山東諸郡。公捍禦有術。部使者以聞。降詔書獎諭。從淮南西路提點刑獄。遷尙書度支員外郎。坐厚善直吏館蘇公軾。得其詩文。不以告。罰金寄祿格行。換朝散郎。遷朝請郎。試太常少卿。公去國十五年。至是還朝。士大夫喜見於色。以謂正人復用也。以職事對稱旨。面賜三品服。未幾。試禮部侍郎。文昌府成。車駕臨幸。恩遷朝奉大夫。上卽位。覃恩遷朝請大夫。試吏部侍郎。遷朝議大夫。俄試戶部尙書。詔百官轉對。公以七事應詔。一曰崇廉恥。二曰存貢舉。三曰別守宰。四曰去賊貪。五曰慎疑獄。六曰擇師儒。七曰修役法。皆當時急務。而其言役法尤合公論。又取差免二法。折衷爲書上之。以爲法。無新陳。便民者良法也。論無彼己。可久者確論也。又曰貧富俱出貲。則貧者之所難堪。使富者出貲。貧者出力。庶乎其可也。大略如此。遷中大夫。除御史中丞。兼侍讀。加龍圖閣直學士。初元豐河決小吳。神宗以河勢方趨西北。難以力回。詔勿復塞。須其自定。增立隄防。而或者以謂非悠遠之策。請開澶淵游河。分殺水勢。又欲自蘇村口截爲隄。導還故處。詔遣公視之。還奏非便。又遣吏部侍郎范公百祿。給事中趙公鼎錫。覆視。奏與公合。而或者猶執前議。銳於興役。朝廷疑之。至是公申論其弊。章六七上。而其役竟罷之。又請分詩賦經義兩科。以盡取士之法。別自致因人爲兩塗。以究省官之術。其忠言讜論。蓋不可以一二舉至於因時乘間。導迎和氣者。多密以啓聞。故莫得而知也。俄守兵部尙書。固辭不受。懇求外補。章屢上。遂出

知鄧州。數月。徙成都府。所及陝府。閬鄉縣。暴卒於傳舍。實元祐五年二月二日也。累勳至上護軍。隴西郡侯。公風度凝遠。與人有恩意。而遇事彊毅。不爲苟合。初。善王荊公。荊公當國。冀其爲助。而詆之。乃力於他人。荊公嘗遣雋喻意曰。所爭者國事。少存朋友之義。公曰。大義滅親。況朋友乎。自存益確。士論以此歸之。少時讀書於廬山五老峯下。白石菴之僧舍。後身雖出仕宦。而書藏於山中。如故。每得異書。輒益之。至九千餘卷。山中之人號李氏山房。仲兄布蚤卒。事其嫂張敬甚。撫其子秉彝如己子。自奉清約。所俸入多少。以贖親族。捐館之日。無贏貲。朝廷聞之。常賻外。特賜五十萬。有文集若干卷。藏于家。初娶狄民。襄陽遵度主簿之女。蚤卒。贈某縣封。遵度亦俊傑士。寶元慶曆間。以文章顯名。再娶魏氏。光祿卿琰之女。亦蚤卒。贈遂寧縣君。又娶遂寧之弟。封安康郡君。子男四人。長曰據。揚州江都縣尉。蚤卒。次曰遠。承奉郎。次曰遂。承務郎。次曰迢。承務郎。女三人。長適郢州長壽縣主簿孫端。次適郊祀齋郎丘揖。次適進士黃叔敖。諸孤自闕鄉扶柩南歸。而公之伯兄時爲江南西路轉運使。遂以其年十月丙午。葬公于南康軍建昌縣千秋之原。前期諸孤請狀公之行治。而公之美實多。難以具著。著其出處始終之大者。以告諸史氏。謹狀。